

Colegio Cristo Rey contento di ta bek na cas

ORANJESTAD- Colegio Cristo Rey ta contento di ta bek na cas, esaki ta segun e director di e scol, Jani stamper. Segun un relato di prensa di Minister di enseñansa esta Michelle Hooyboer- Winklaar, e edificio renoba ta un beyesa.

Durante reapertura di Colegio Cristo Rey, sra. Hooyboer-Winklaar a combersa cu Sr. Stamper.



Sr. Stamper a conta den e relato cu e ta orguyoso di con e trabaonan a bay y ta enfatisa e orguyo cu ta existi di trempan cerca e alumnonan cu porfin a haya nan scol bek y ta na unda nan kier ta. “Mi sa cu e caminda pa a yega na e complementacion di loke nos ta mira nos dilanti awe, un Colegio Cristo Rey completamente renoba, no tabata facil pero semper nos prioridad tabata e siguridat pa cu e muchanan y maestronan” su persona a comenta.

Segun e relato un di e motibonan dicin e trabou a dura mas cu locual a pronostica ta debi na trabounan extra cu a bini, manera ta drechamento

di e gymzaal y tambe a traha un entrada extra pa e scol. E ultimo aki tin mas di haber cu siguridat di e muchanan. A adapta e entrada pa un auto manera Brandweer por drenta cu mas facilidad.

Sr. Stamper ta haci un yamada na tur mayor, famia, bisninan den bario, pa duna un man cu e biblioteca di Colegio Cristo Rey.

Ya cu segun su persona un di e metanan pa aña escolar nobo y pa bida largo ta pa stimula e mucha pa lesa, pa conoce e mundo traves di fantasia di un buki. Y asina domina idiomanan mas facil y sigur di su mes. □